

Griffie ER Bonaire	
Ingek.:	SEP 23 2016
Volgnummer:	2016008893
Griffier:	Uitv.:

Karta fecha: 15.04.2016
Nos Nr.: 2016008876
Kralendijk 22 SEP 2016
Tópiko: preguntanan konforme
art. 45 RvO di miembro KI
sra. D. Coffie tokante "Dia
di Rincon"

Apresiabel Sr. Cecilia,

Den karta, fecha 15 di aprel 2016, frakshon di partido di Movementu di Pueblo Boneriano, den persona di miembro di Raad sra. Coffie a hasi un pregunta den direkshon di Kolegio Ehekutivo tokante Dia di Rincon.

Risibí athunto e kontesta di Kolegio Ehekutivo:

Kiko gobièrnu di Boneiru konkretamente a hasi último dos añanan pa hasi dia di Rincon bira un dia di fiesta ofisial?

Riba fecha 20 di febrüari 2014, ku number di archivo 2014001845, gobièrnu di Boneiru a manda un karta ofishal pa Minister di asuntunan interno i di relashon di reino i Minister di asuntunan sosial i di labor pa medio di representante di Reino, sr. W.J. Stolte ku e petishon pa konforme Artíkulo 23, insiso 4 di Lei di Labor 2000 BES i Artíkulo 37 di "Rechtspositiebesluit ambtenaren BES" pa apuntá 30 di aprel komo un dia di fiesta ofishal.

Motibunán pa supstansia e petishon aki tabata:

- E fecha di 30 di aprel ta simbolisá e selebrashon di kosecha.
- E fecha di 30 di aprel ta wòrdu sigui dor di un òf mas dianan liber ofishal (dia di obrero).
- E historia i tradishon mará na e dia
- Balor kultural di dia 30 di aprel.
- Balor di Dia di Rincon pa otro islanan ruman.
- Importansia di Dia 30 di aprel pa e komunidad.

Den un karta fechá 10 di aprel 2014, Minister di asuntunan interno i relashon di Reino ta duna aprobashon pa selebrashon di Dia di Rincon pa aña 2014 komo un dia liber, pero ta mostra riba e echo ku mester sigui traha riba alternativanan pa por logra kambia e lei i yega na nominá e fecha di 30 di aprel komo un dia liber ofishal pa añanan ku ta sigui.



Riba fecha 28 di yanüari 2015, gobièrnu di Boneiru ta pone Minister di asuntunan interno i di Reino na altura di a risibí su karta di 10 aprel 2014 i gobièrnu di Boneiru ta hasi e petishon na Minister pa duna su aprobashon pa selebrá dia 30 di aprel 2015 tambe komo un dia liber ofishal en espera di kambio den e lei di Labor 2000 BES i "Rechtspositiebesluit ambtenaren BES".

Den karta fechá 11 di febrüari 2015, ta proponé e siguiente solushon pa logra dia 30 di aprel komo dia liber ofishal:

- Ta skohe pa mantené e kantidat di dianan liber ofishal igual i ta sugerí pa kambia un otro fecha ku ta dia liber ofishal kaba pa hasi dia 30 di aprel un dia liber ofishal. Esaki mester bai den akuerdo ku islanan Saba i Sint Eustatius
- Tambe por krea un dia liber ofishal mas aserka, pero den esaki mester tene kuenta ku e gastunan ku esaki ta trese ku n'e pa dunadó di trabou. Por ehèmpel por skohe pa baha e kantidat di dianan di vakashon ora Dia di Rincon ta kai riba un dia di trabou.

Riba 7 di aprel 2015, gobièrnu di Boneiru ta reakshoná riba e karta di 11 di febrüari 2015 di Minister di asuntu interno i di relashonnan di Reino. Den e karta akí gobièrnu di Boneiru ta pone na konosementu di Minister ku den Diálogo Sentral ku sindikato i representantenan di dunadó di trabou ku Boneiru ta opta pa mantené e kantidat di dianan di fiesta ofishal igual i ta proponé pa kambia 15 di desèmber, anterior Dia di Reino, pa 30 di aprel ku ta e dia riba kua Boneiru ta selebrá Dia di Rincon.

Den su reakshon riba e karta di 7 di aprel 2015 di Gobièrnu di Boneiru, Minister di asuntu interno i di relashonnan di Reino, den karta di 16 di aprel 2015 ta pone Gobièrnu na altura ku e eskoho pa kambia 15 di desèmber pa 30 di aprel komo dia liber ofishal no ta posibel. Debí ku segun Artíkulo 23 di Lei di Labor 2000 BES, 15 di desèmber, no ta un dia di fiesta ofishal pa sektor privá. Ku otro palabra di 15 desèmber no ta un dia di fiesta pa pueblo di Boneiru en general.

Den un karta di 10 di novèmber 2015, Minister di asuntu interno i di relashonnan di Reino, ta bolbe mostra riba e tres opshonnan ku ta eksistí pa ku selebrashon di Dia di Rincon:

- Selebrá dia di Rincon riba un otro dia di fiesta ofishal (por ehèmpel djaluna di karnaval òf 1 di mei)
- Krea un dia di fiesta ofishal aserka
- Kambia un otro dia di fiesta eksistente pa logra hasi 30 di aprel un dia di fiesta ofishal.

Den su último karta, fechá 14 di aprel 2016, Minister di asuntu interno i di relashonnan di Reino un biaha mas ta kòrda gobièrnu di Boneiru riba e



desishon ku mester wòrdu tumá pa ku Dia di Rincon komo dia di fiesta ofishal.

Durante di e diálogo sentral entre gobièrnu, representantenan di dunadó di trabou i sindikatonan, gobièrnu a plantia e idea pa skohe for di e fechanan ku ya kaba ta un dia di fiesta ofishal sigun Artikulo 23 di Lei di Labor 2000 BES pa entregá, pa asina logra konkretisá dia 30 di aprel komo dia di fiesta ofishal.

Konkretamente a bini proposishon pa entregá e djaluna despues di marcha grandi di karnaval. Den Reunion di 7 di yùli 2016 a diskutí e proposishon i representante di dunadó di trabou a bai di akuerdo. Representante di sindikato a keda di bai hasi un enkuesta i bin ku e resultado promé ku e siguiente reunion di dia 28 di yùli 2016. Sin embargo via di karta, fechá 25 di yùli 2016, representantenan di sindikato a duna di konosé ku nan no a alkansá di tene un enkuesta bou di nan miembronan i ku alabes esaki a trese pregunta tokante e enkuesta su representividat. Nan a duna di konosé ku nan lo keda para pa e proposishon pa proklamá e 15 di desèmber komo dia ofishal liber i kambia esaki pa Dia di Rincon.

Den e reunion di 28 di yùli 2016 dunadónan di trabou a bolbe afirmá ku meskos ku representantenan di gobièrnu nan ta di akuerdo ku e proposishon di kambia e djaluna despues di marcha grandi di karnaval. Diputado a duna di konosé ku no ta deseabel pa bai kambia e 15 di desèmber ku ta dia di Nort Saliña pa dia di Rincon, pa asina no faboresé niun barío riba otro. A palabra ku kolegio ehekutivo lo bai deliberá, teniendo tantu deseo di representante di dunadó di trabou komo representante di sindikato na kuenta i lo trese e resultado di esaki bek na konosementu den un siguiente diálogo sentral.

Atentamente,

Kolegio Ehekutivo di Entidat Públiko di Boneiru,

gezaghèber, *wnd.*

sekretario, *wnd.*

Kopia: K.I, K.E